

武強縣志重修卷十

雜稽志

自叢書出而摭摭類記之法閱凡以類相從者
可分類以聚之而類之難一者不妨別出以記
之此雜稽之所由志也斯卷記機祥戎事傳疑
示戒諸條而知休咎之所徵實以昭象緯之所
感禍福之立應卽以見顯道之維彰鑑古準今
懸象施教誠未可以泄視而思患豫防尤宜盡
心於其間詎可以爲迂圖而畧而勿講也哉然

則附錄諸則亦爲政者之要也志雜稽

機祥

晉懷帝永嘉四年八月滹沱河溢 七年二月太
白犯昴 夏五月又入畢口犯左股 二十年
十一月太黃星出於畢昴之分五十日

唐高宗永徽五年六月滹沱溢

元宗開元十五年河溢

天寶十四年春二月熒惑太白闕於畢昴至四
月乃伏

代宗大歷十年秋九月月暈畢昴中有黑氣乍
合乍散

宋太宗太平興國八年秋七月漳沱溢詔死罪以
下釋之

元順帝至正元年春二月民饑丙申丁酉連年漳
沱溢奔沒城垣及儒學

明憲宗成化十四年大水 十八年又水淫雨不
止漳沱溢傾城郭舟楫入縣魚行人路

孝宗弘治二年夏大水

武宗正德二年大雪平地丈餘井谷皆平民多
凍死號饕雪 三年地震白毛生 七年傳有
黑眚不見其形遇人輒刺面流血人晝夜不寧
鳴金持兵自衛旬日乃定六月蝗蝻食稼殆盡
知縣邢大經奏之

世宗嘉靖二年三月初二日大風霾紅沙四塞
白晝爲昏六日復作 六年蝗飛蔽日明年復
爲災 八年自春徂夏不雨蝗蝻食禾稼八月
隕霜殺稼民大饑斗米百錢民間有父食子夫

食妻者詔煮粥賑恤 九年七月水潯漳並溢
渰倒城垣數十處四關居民一空舟行樹杪境
無尺土知縣張籍奏之 十二年春三月白氣
三股起文廟東北隅 十七年冬十月地震有
聲 十八年夏儒學教諭宅起龍三條鱗甲宛
然飛騰而去 二十一年春黃霾四塞晝晦星
見夏大疫男婦死者甚衆遍地蝻生水渰城西
北隅梨花秋放榆錢實八月震雷雨雹於古河
村 二十二年歲大有縣治庭前棟上產芝草

穀秀二穗庭椿枯朽復榮編修歐陽喚譔三瑞
碑 二十三年冬十月大風紅霾四塞 二十
四年閏正月二十八日大風異常屋瓦皆飛歲
大旱民逃亡夏四月民人張某家豕生二子而
俱似人形無毛五月大旱人民大移 二十七
年夏四月八日午五色雲見光彩瑩然移時方
解 二十九年三月二十二日夜黑風大作如
漆屋瓦皆飛五月初四日黃風異常六日風霾
蔽天九月初五日雨冰十七日午東北流星赤

光如斗化爲白雲凝久而散 三十二年滹沱
溢大水圍城十二日漳水大溢壞民田舍秋稼
盡沒冬大饑羣盜蜂起 三十九年大旱井底
涸民大饑 四十三年八月二十日雷雹傷稼
樹木皆拔

穆宗隆慶元年滹沱水清累日 三年夏六月
滹沱溢平地丈餘時城新修不浸者三版

神宗萬歷八年閏四月二十八日風雷拔木雨
雹尺餘 十年春三月旱疫大作項腫者三日

卽死號爲大頭瘟 十七年蝗訛傳朝廷選宮

女有七八歲幼女服笄隨夫者 二十七年旱

正月至七月方雨禾將秀蟲食其根民饑並疫

二十八年旱蝗蝻食禾殆盡積屍滿野或棄

子女井中鬻妻自縊二月瘟疫傳染村落爲墟

巡撫汪奏請借臨清德州二倉米及晉州穀賑

之民受其賜 二十九年旱至六月方雨

禮吏杜欽明者人謹飭而有雅趣邑之士人多

作蘭石交今歲修 文廟輯志書兩大事頗任

其勞一日以外間所藏凶年圖一冊送閱蓋萬
歷年間文生于君時躍所製也爲圖十二繪萬
歷二十七八九三載歲饑情狀一蟲災二流民
三乞食四賣女五棄子六搶街七刮樹食糠八
服毒自縊九盜賊十次年正月東街賣人肉十
一二月瘟疫十二逃民前有自叙道荒歉之狀
雖幸未遇而熟悉鄰之窘狀恐任耳猶或傳訛
目覩乃爲親悉然困苦之狀安能目盡觀而筆
盡書第粗陳其概倘遇歲豐一閱其圖庶此心

不敢忘歉亦防患未然之意竊謂于君非親見其狀斷難憑空結撰茲之所述毋乃隱言以寓規諷之旨及觀其各圖後說窮情殆盡乃知寫民間之疾苦實寓清議之微詞末綴善後事宜數條有曰邑雖有預備常平社倉止爲奸猾之利藪善良守分之輩其何所賴不若約結同志立簿積谷計一年務得一倍春散秋收數年之間必將充盈卒遇荒歉豈能爲患不踰於趕會道塲徒資無益之費者乎吁于君此言不獨爲

救荒之良術抑亦寄憫世之深心視鄭俠之進
流民圖何敢多讓億萬歷至今二百餘年矣金
石之器尙多剝落而斯圖猶在不爲蠹魚所蠹
豈非靈爽式憑令後之見者悚然惕而蹶然興
乎余旣愛之不忍釋適纂志至是年而記及前
事因附錄之作爲金鉞焉可

三十五年漳漳交溢先時城內井泉甘美地稱
肥腴經水後井皆鹹地皆鹺矣 三十九年水

四十一年水 四十六年八月彗見出於東

南掃西北八十餘日乃滅

熹宗天啟元年水溢民饑

莊烈帝崇禎十三年大水 十四年春黑霾四塞
晝晦歲歉斗米千錢 十五年瘟疫大作幸境
內熟深州武邑就食者賴以全活 十七年正
月太白經天

國朝

世祖順治五年大水督撫奏請免田租十分之三
七年大水免田租三分之一 九年十年旱 十

一年民饑

詔遣兵部尙書王永吉賑濟 十三年大水民饑蠲

租有差 十四年大水民饑

詔遣戶部尙書王崇簡賑濟 十八年水免田租十

分之三

聖祖康熙二年四年連罹水災免田租十分之三 六

年春夏旱六月雨漳水漫衍自深州及衡水橫

溢武強東南東北禾盡淹蝗害稼 七年春淫

雨地震水渰賑米豆銀兩春冬二次 十四年

大風殺稼歲儉 十五年四月霜害稼 十七
年六月雨雹大風拔木 十八年地大震 二
十二年十月地震 二十四年水免田租三分
之一 二十八年旱

詔蠲本年未經徵收及來年春夏田租仍發帑賑濟
三十一年四月馬家莊麥秀兩岐 三十二
年水免田租十分之三 三十五年秋大雨七
晝夜河水漲溢禾稼漂沒

詔免本年租賦之半 四十九年旱麥禾俱災 五

十年

恩蠲本年田租歷年未完者並行停徵

世宗雍正元年

賜老民婦肉帛有差 二年秋大稔 三年滹沱河

溢秋禾被水

詔免田租三之一發粟賑饑 四年秋大水禾渰沒

詔免租賦 十一年水蠲免地糧三分之一發粟賑

濟

高宗乾隆元年

賜老民婦七十以上肉帛有差 二年七月大水滹

沱溢

詔蠲賑有差九月民人楊守有妻蔡氏一產三男

三年秋大水題准賑免 四年秋禾被水題准

蠲免 七年冬十一月彗星見次年二月始沒

八年夏大旱風日如火人多暍死禾苗盡槁

斗米千錢題准賑免 九年秋大熟 十四年

夏六月初十日雨後五色雲見東方冬十一月

大雪越兩晝夜平地雪深數尺 十六年春三

月大雪平地尺許人畜多凍斃五月朔日有食
之六月滹沱河溢 二十六年

賜老民婦肉帛有差 三十五年

恩蠲天下本年正賦 三十九年秋旱饑

詔緩徵 四十年春大疫 四十二年

恩蠲天下四十三年正賦 四十九年秋七月雨雹

五十四年秋歲饑

詔蠲正賦十分之一 五十五年秋大水

恩蠲天下正賦一年 五十六年春正月地震 五